

थेसलोनिकी हुँकन



पावलक लिखल चिठी

थेसलोनिकी हुँकन
पावलक लिखल चिठी

(दङ्गौरा थारु)

२०६७

Paul's letters
written to the
Thessalonians

Trial Edition
2011
(500 copies)

Illustration on cover by
© David C. Cook Publishing Co, 1978.
Used with permission.

Illustrations on pages 6, and 8 by Horace Knowles, revised
by Louise Bass
© The British and Foreign Bible Society, 1994.
Used with permission.

Illustration page 10 by Graham Wade
© United Bible Societies, 1989, Nairobi, Kenya.
Used with permission.

Dangaura Tharu Language and
Literature Project and
Dangaura Tharu Translation Committee

थेसलोनिकीहुँकन

पावलक लिखल पैल्ह चिठी

चिठीक परिचय

पावल खुशिक खबर प्रचार कर्ना क्रमम सिलास ओ तिमोथीकसँग माकेडोनिया क्षेत्रम पुगरलह (नक्शा हेरी)। हुँकन माकेडोनियक फिलिप्पी शहरम खुशिक खबर प्रचार कर्ल। तबदोस्र पावल ओ सिलास माकेडोनियक राजधानी शहर थेसलोनिकाम गैल (प्रेरित १७:१)। हुँकन उहाँ खुशिक खबर प्रचार कर्ल त धेर मनै विश्वास कर्ल (प्रेरित १७:४; १ थेसलोनिकी १:९)।

हुँकन उहाँसे बेरिया शहरम गैल, ओ उ शहरम प्रचार कर्ल, उहाँ फे धेर मनै विश्वासी हुइल। तबदोस्र पावल एथेन्स शहरम गैल। उ एथेन्सम प्रचार कर्ल ओ कुछ समय पाछ सिलास ओ तिमोथी हुँकाहारठे अइल। पावल एथेन्सम रहलम थेसलोनिकीहुँकन विश्वासम बलगर पलबाट कि नाहीं कैक बुझक लाग ओ हुँकन अर्तीउपदेश देहक लाग तिमोथीह थेसलोनिकाम पठैल (प्रेरित १७:१६; १ थेसलोनिकी ३:१-५)।

पावल एथेन्ससे बिदा होक कोरिन्थ शहरम गैल (प्रेरित १८:१)। पाछ सिलास ओ तिमोथी पावलकठे अइल (प्रेरित १८:५)। तिमोथी उत्साहजनक हालखबर लेक थेसलोनिकासे घुम्क अइल त, पावल थेसलोनिकीहुँकन पैल्ह चिठी लिखल (१ थेसलोनिकी ३:६)।

पावल खास कैक थेसलोनिकाम रहल विश्वासीन उत्साह देहक लाग यी चिठी लिखलह। पावल यी चिठी कैह्या लिखल कना बात बाइबल विद्वानहुँकन स्पष्ट रूपले कह नैसेकट। प्रेरित १८:१२-१४ अनुसार, पावल कोरिन्थम रहल समयम गलियोन शासक रहलह। याकर मतलब पावल यी चिठी सम्भवत: येशू जर्मलक ५० वर्ष पाछ लिखल।

विषयसूचि

- पावल थेसलोनिका शहरम रहल मण्डलीह चिठी लिखठ (१:१)
- पावल थेसलोनिकीहुँक्र विश्वासी जीवन जीटीरलक कारण परमेश्वरह
धन्यवाद चहैठ (१:२-१०)
- पावल थेसलोनिकीहुँकन खुशिक खबर प्रचार करबेरिक घटना सम्झैठ
(२:१-१६)
- पावल थेसलोनिकीन्हकठे फेदोस्र जैना आपन इच्छा रहल बात बटोइठ
(२:१७-२०)
- पावल तिमोथीह थेसलोनिकीन्हकठे पठैलक कारण देठ (३:१-५)
- तिमोथी थेसलोनिकीन्हकठेसे उत्साहजनक हालखबर लेक पावलकठे अइठ
(३:६-१३)
- पावल असल ख्रीष्टीयन जीवन जीना बारेम व्यवहारिक सल्लाह देठ
(४:१-१२)
- पावल येशू ख्रीष्ट जब फे आइसेक्ना हुइलकओसे थेसलोनिकीहुँक्र सचेत
रहपर्ना बारेमा सिखैठ (४:१३-५:११)
- पावल ख्रीष्टीयन जीवन परमेश्वरह आदर देना हिसाबक हुइपर्ना कैक
सिखैठ (५:१२-२८)

पावल थेसलोनिका शहरम रहल मण्डलीह चिठी लिखठ

१

परमेश्वर बाबा ओ प्रभु येशू ख्रीष्टक थेसलोनिकाम रहल मण्डलीह हम्र पावल,[†] सिलास ओ तिमोथी यी चिठी लिखटी।[†] परमेश्वर दुहन अनुग्रह[‡] ओ शान्ति देहीं।

पावल थेसलोनिकीहुँक विश्वासी जीवन जीटीरलक कारण परमेश्वरह धन्यवाद चहैठ

^२ हम्र प्रार्थना करबेर सड्ड दुह सबजहन सम्झठी ओ परमेश्वरह धन्यवाद चहैठी। ^३ विश्वाससे करल दुन्हक काम, प्रेमसे करल दुन्हक परिश्रम, ओ प्रभु येशू ख्रीष्टकम रहल दुन्हक सहनशील आशा हमार परमेश्वर बाबक सामुने हम्र सम्झटीरठी।

^४ हेरो भैयौ, परमेश्वर जो दुहन प्रेम कैक रोज्लह कना बात हमन थाहाँ बा। ^५ काकरकि दुहन प्रचार कैगिल् खुशिक खबर गफ केल नैरह, तर पवित्र आत्मक शक्तिले पक्का होक प्रचार कैगिल् सत्य वचन रह। ओ दुन्हकसँग रहलम दुन्हकके हितक लाग हमार जीवन कसिन रह कना बात दुह अपन्हे जन्लबाटो। ^६ हो, दुन्हकम आपत्विपत् परिआइल, तर फे दुह पवित्र आत्मक दिहल आनन्दम वचनह ग्रहण कर्लरलो। यी हिसाबले दुह हमार ओ प्रभुक देखासिकी कर्लो। ^७ असिक दुह माकेडोनिया ओ अखैया क्षेत्रम रहल सब विश्वासीन्हक आघ एकठो नमुना बनरलो।

^८ दुन्हक कारणले परमेश्वरक वचन माकेडोनिया ओ अखैयम केल नैफैलल्, तर परमेश्वरकम रहल दुन्हक विश्वासक बात सक्कुओर फैलल् बा। याकर बारेम हमार कहपर्ना बात कुछु नैहो। ^९ हम्र दुन्हकठे अइली त, दुह हमन कसिन

[†] १.१ पावल खुशिक खबर प्रचार कर्ना कामम एक प्रभावशाली व्यक्ति रहल। थप जानकारीक लाग "पावल" शब्दक अर्थ हेरी।

[†] १.१ हुइना त, पैल्ह वाक्य पहबेर यी चिठी तीन जन पावल, सिलास ओ तिमोथी मिल्ल संयुक्त रुपम लिखल जसिन देखपठो, तर वास्तवम यी चिठी लिखुइया व्यक्ति पावल हुइठ, ओ काजे यिहाँ सिलास ओ तिमोथीक नाउँ फे उल्लेख हुइल् बा कलसे, संभवतः पावल थेसलोनिकाम रहल समयम हुँक पावलकसँग रहल, ओ पावल यी चिठी लिखबेर फे हुँक पावलकसँग रहल।

[‡] १.१ अनुग्रहः वाइबलम अनुग्रह कलसे क्षमादान, मुक्तिदान, अचूक प्रेम, अपार कृपा आदि विषयह समेट्ठा। निगाहा, दया आदि शब्द फे अनुग्रहक अर्थ देठा। परमेश्वरक अनुग्रह कारणले हम्र मुक्ति पैठी (एफिसी २:८; तीतस २:११)। हम्र पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठैल (रोमी ५:८)।

स्वागत कर्लो, ओ जीवित ओ सत्य परमेश्वरक सेवा करक लाग मूर्तिपूजमसे कसिक घुम्लो कना बात हुँकर अपन्हे बटोइठ। १० टुह त परमेश्वरक छावा स्वर्गसे अउइया बाट कैक बट्या हेठो हूँ। उहाँ मुवलमसे फेदोस परमेश्वरक जीयाइल येशू हुइट। परमेश्वरसे अइना डरलगिटक दण्डमसे हमन बँचुइया फे उहाँ जो हुइट।

पावल थेसलोनिकीहुँकन खुशिक खबर प्रचार करबेरिक घटना सम्झैठ

२ हेरो भैयौ, टुन्हकठे हमार करल भेटघाट बिनकामक नैरह कैक त टुह अपन्हे जन्लबाटो। २ टुन्हकठे जैनासे आघ हम्न फिलिप्पी शहरम दुख पैलक ओ अपमानित हुइलक बात फे टुहन थाहाँ बा। तर धेर विरोध हुइटी-हुइटी फे हम्न टुहन खुशिक खबर प्रचार करक लाग परमेश्वरसे धेर साहस पैली।

३ काकरकि हमार दिहल अर्तीउपदेशम गल्टी बात, खराब विचार या कुछ छलकपट नैरह। ४ तर परमेश्वर हमन योग्य मान्क त खुशिक खबर प्रचार कर्ना जिम्मा देलह। उहओसे हम्न मनैन खुसी बनाइक लाग नाहीं तर हमार मनक जाँच करुइया परमेश्वरह खुसी बनाइक लाग बोल्ठी। ५ हम्न टुन्हकठे कुछ चापलुसी बात नैबटोइली कैक टुह जन्लबाटो। कुछ पैना ल्वाभले हम्न टुन्हक लगघक मनै हुइ नैखोज्ली कना बातक साक्षी त परमेश्वर पलबाट। ६ हम्न मनैनसे आदर नैखोज्ली, ना त टुहनसे, ना और कौनोजहनसे। ७ हुइना त ख्रीष्टक प्रतिनिधि हुइलकओसे हम्न टुन्हकम आपन अधिकार प्रयोग कर सेक्नेरलही, तर लकोँन्या डाई आपन लर्कक् वास्ता करअस हम्न टुहनसे नम्न व्यवहार कर्ली। ८ हम्न टुहन धेर प्रेम कर्ली। उहओसे हम्न आनन्दित होक टुहन खुशिक खबर प्रचार केल नैकर्ली, तर टुन्हक वास्ता कैक हम्न आपन प्राणसमेत देहक लाग तयार रलही।

९ हेरो भैयौ, हम्न टुहन परमेश्वरक खुशिक खबर प्रचार करबेर किहुह फे भार नैपारी, तर आपन खर्च अपन्हे कमाइ कैक रातदिन खट्क काम कर्लक बात त टुह सम्झलबाटो।

१० टुह विश्वासीन्हकठे रहल समयम हमार व्यवहार स्वच्छ, ठीक, ओ निर्दोष रह। यी बातक साक्षी परमेश्वर ओ टुह अपन्हे बाटो। ११ ओ डाई-बाबा आपन छाइछावनसे करअस, हम्न टुह हरेकजहनसे व्यवहार कर्ली। यी बात टुहन थाहाँ बा। १२ टुन्हक चालचलन परमेश्वरक नजरम योग्य ह्वाए

कना उद्देश्यले हम्न टुहन अर्तीउपदेश, उत्साह, ओ आदेश देटीरली। काकरकि परमेश्वर आपन राज्य ओ महानतम टुहन सहभागी हुइक लाग बलैठ।

१३ ओ हम्न परमेश्वरह धन्यवाद चहैटीरठी, काकरकि हम्न टुहन परमेश्वरक वचन सुनैली त, टुह उ वचनह मनैन्हक वचनअस नाहीं, तर जाट्टीसे परमेश्वरक वचन मान्क स्वीकार कर्ली। हुइना फे उ परमेश्वरकऽ वचन हो, ओ उ वचन टुह विश्वास करुइयन्हक जीवनम काम कर्टीरठा।

१४ यी बात हमन थाहाँ बा, हेरो भैयौ, काकरकि टुन्हकम जौन बात परिआइल उह बात यहूदीया क्षेत्रम रहल परमेश्वरक मण्डलीम अर्थात् खीष्ट येशूकम विश्वास करल मनैन्हकम परिअइलन्। हुँक आप्पन जाति यहूदीनसे संतावा पैलह, ओ ओसहँक, टुह फे आप्पन जातिक मनैनसे संतावा पैलो। १५ उह यहूदी जातिक मनै अगमवक्तन* मुवैलह। प्रभु येशूह मुउइयन ओ हमन संतुइयन फे हुँकहे हुइठ। हुँक परमेश्वरह मन नैपर्ना काम कर्ठ ओ सारा मनैन्हक विरोधीअस बाटा। १६ अयहूदीहुँकन मुक्तिक सन्देश सुनैना हमार कामम हुँक बाधा पुगैल। असिक हुँक टिस्लाहार हुइट्सम आपन पापक उप्पर पाप थप्टीरठा। तर आखिरम परमेश्वरक रिस हुँकन्हकम पररलन।

पावल थेसलोनिकीन्हकठे फेदोस्र जैना आपन इच्छा रहल बात बटोइठ

१७ हेरो भैयौ, हमन एकघरिक लाग टुहनसे दूर हुइ परल, तर फे हमार मन त टुन्हककेसँग बा। टुहन आमनेसामने देखना हमार एकदम धेर चाहना रलकओसें हम्न टुन्हकठे जाइक लाग स्याकलसम कोसिस कर्ली। १८ हम्न त टुन्हकठे जाइक लाग रलही – वास्तवम मै पावल झन् घरीघरी कोसिस कर्नु – तर शैतान हमन

* २.१५ अगमवक्तन: अगमवक्ता कलक परमेश्वरक वचन बोल्ना व्यक्ति हुइठ। थप जानकारीक लाग "अगमवक्ता / अगमवाणी" शब्दक अर्थ हेरी।

छेकदेहल। १९ काकरकि जब हमार प्रभु येशू अइहीं, तब आशा ओ आनन्द कर्ना, ओ मुकुट⁺ पैलकम गर्व कर्ना कारण का हुई? का यी दुहहे नैहुइटो? २० जाट्टीसे हमार गौरव ओ आनन्द दुहहे हुइटो।

पावल तिमोथीह थेसलोनिकीन्हकठे पठैलक कारण देठ

३ आखिरम हम्र दुहनसे दूर होक रह नैस्याकलगली त, एथेन्सम सिलास ओ मै रना विचार कर्ली, २ ओ तिमोथीहजुन दुन्हकठे पठैली। उ हमार भैया हुइट ओ परमेश्वरक सेवकक् रुपम ख्रीष्टक बारेम खुशिक खबर प्रचार कठ। हम्र दुहन विश्वासम बलगर कराइक लाग ओ हौसला देहक लाग हुँकहीन पठैलही। ३ दुख पैलकम दुह कुइ फे हरेस जिन खैहो कना हमार चाहना रह। दुख त हम्र विश्वासिन्हक जीवनम अइबोकठा कना बात दुह जन्लबाटो। ४ काकरकि दुन्हकसँग रहल समयम हम्र सब जन दुख पउइयबाटी कैक घरीघरी कलही।



मुकुट पहिरल मनैया (२:१९)

⁺२.१९ पावलक समयम असिन मुकुट विशेष किसिमक वनस्पतिले बनाजाए ओ खेलकुदम जितल मनैयाह पुरस्कारक रुपम पहिराजाए।

हमार कहल बात ट्याक्क लागल। यी त दुहन थाहाँ बा। ^५उहओसे, मै एको रह नैस्याक लगनु त, दुह विश्वासम बलगर पलबाटो कि नाहीं कैक बुझक लाग मै तिमोथीह दुन्हकठे पठैनहूँ। पापम फँसाइ खोजुइया, शैतान, कहों दुहन फे फँसाक हमार परिश्रम बेकार कैदेहल कि कैक मै डरारनहूँ।

तिमोथी थेसलोनिकीन्हकठेसे उत्साहजनक हालखबर लेक पावलकठे अइठ

^६तर आब त तिमोथी दुन्हकठेसे घुम्क यिहाँ आरल ओ दुन्हक विश्वास ओ प्रेमक बारेम खुशिक खबर हमन सुनैल। दुह हमन सड्ड प्रेमसे सम्झठो, ओ हम्र दुहन भँटना धेर चाहना करलअस दुह फे हमन भँटना धेर चाहना कर्लबाटो कना खबर उ देल। ^७उहओसे, हेरो भैयौ, दुन्हक विश्वासक खबर सुन्क हम्र आपन सारा दुखकष्टम फे हौसला पारखली। ^८काकरकि दुह प्रभुम स्थिर बाटो कैक हम्र सुन्ती त, हमन लौव जीवन पाइलअस लागल। ^९दुन्हक लाग हम्र परमेश्वरह जत्रा धन्यवाद चहैलसे फे नैपुगट! दुन्हक कारणले हम्र परमेश्वरक सामुन्ने धेर आनन्दक अनुभव कठीं। ^{१०}दुहनसे फेदोस्र भ्याँट कैक दुहन आकुर सिकाइसेकी ताकि दुन्हक विश्वासम ज्या ज्या बातक कमि बा, उ पूरा हुई कना उद्देश्यले हम्र रातदिन जोशसे प्रार्थना कठीं।


^{११}आब हमार परमेश्वर बाबा अपन्हे ओ हमार प्रभु येशू हम्र दुन्हकठे जैना डगर हमार लाग बनादेहीं, ^{१२}ओ जौन हिसाबले हम्र दुहन प्रेम कठीं, उह हिसाबले प्रभु दुहन एक आपसम ओ सबजहनसे प्रेमम झन्झन् बहैटीरहीं ओ भर्क फल्कना बनैहीं कना हमार प्रार्थना बा। ^{१३}उह प्रेमले दुन्हक मन अडिग हुई ताकि जब हमार प्रभु येशू आपन सारा पवित्र मनैन्हकसँग फेदोस्र अइहीं, तब दुह हमार परमेश्वर बाबक सामुन्ने निर्दोष ओ पवित्र हुइबो कना हमार प्रार्थना बा।

पावल असल ख्रीष्टीयन जीवन जीना बारेम व्यवहारिक सल्लाह देठ

✂ आखिरम, हेरो भैयौ, दुन्हक जीवन झन्झन् असल हुइटीजाए कैक प्रभु येशूक नाउँम हमार जोड्दार बिन्ती बा। परमेश्वरह मन पर्ना हिसाबले कसिक जीएपठाँ कैक हम्र दुहन सिखारखली, ओ हमार सिखाइलअस दुह जीटी फे बाटो। ^२काकरकि हम्र प्रभु येशूसे पाइल अधिकारले दुहन देहल निर्देशन

टुह जन्लबाटो। ३ परमेश्वर टुह पवित्र हुइल् चहठ, उहओसें व्यभिचारसे अलग रहो। ४ पवित्र ओ आदरणीय तरीकाले आपन गोसिनेसे जीवन बितैना बात हरेक व्यक्ति जानपठा।⁺ ५ परमेश्वरह नैचिहन्ना मनैन्हकअस कामवासनक खराब विचार जिन करो। ६ असिन खराब काम कैक कुइ फे विश्वासीकमसे नाजायज फाइदा जिन लगहो। परमेश्वर असिक करुइयनसे बदला लेठ। हम्र यी बातक बारेम टुहन पैल्हहें गम्भीर चेतावनी देरखली। ७ काकरकि परमेश्वर हमन अपवित्र नाहीं, तर पवित्र जीवन बिताइक लाग बलैलह। ८ उहओसें यी निर्देशनह इन्कार करुइयन, मनैन नाहीं, परमेश्वरह इन्कार कठ, जौन परमेश्वर आपन पवित्र आत्मा टुहन देठ।

९ एक आपसम प्रेम कर्ना बारेम टुहन लिख पर्ना आवश्यक नैहो, काकरकि एक आपसम प्रेम करपठा कैक त टुह परमेश्वरसे सिखरखलो। १० वास्तवम, टुह सारा माकेडोनियक विश्वासीहुँकन प्रेम कठो। तर फे, हेरो भैयौ, आकुर धेर प्रेम कर्टीजाओ कैक हम्र टुहनसे बिन्ती करटी। ११ हम्र टुहन पैल्हहें देहल निर्देशन अनुसार, शान्त जीवन बितैना, आपन-आपन कामम ध्यान देना, ओ आप्पन हाँठले कमैना धेर से धेर कोसिस करो। १२ यदि टुह असिक कर्बो कलसे, ख्रीष्टम विश्वास नैकरुइयन फे टुन्हक आदर करहीं, ओ टुहन केक्रोम फे भर पर नैपरी।



तुरही (४:१६)

⁺४.४ ग्रीक भाषक स्रोतमसे यी पदह अनुवाद कर्ना और सम्भावित तरीका: पवित्र ओ आदरणीय तरीकाले आपन शरीरह अधीन कर्ना बात हरेक व्यक्ति जान पठा।

पावल येशू ख्रीष्ट जब फे आइसेकना हुइलकओसें थेसलोनिकीहुँक सचेत रहपर्ना बारेमा सिखैठ

१३ हेरो भेयौ, मुस्याकल विश्वासीन का हुहीन् कना बारेम दुह्र बात बुझल हम्न चहठी, ताकि टुहन आशा नैरना मनैन्हकअस शोक कर नैपरी। १४ काकरकि हम्न येशू मुल ओ फेदोस्र जीयागैल कैक विश्वास कठी, ओ येशू फेदोस्र अइहीं त, मुनासे आघ येशूकम विश्वास करल मनैन परमेश्वर फेदोस्र जीयादेहुइया बाट ओ उहाँकसँग अनुइया बाट। १५ प्रभुक देहल वचन हम्न टुहन देठी, कि प्रभु फेदोस्र अइना दिनसम हम्न जीटीह रहुइयन उ मुवल मनैनसे आघ उहाँह नैभेटैनेहुइटी। १६ काकरकि प्रभु अपन्हे हुकुम गुञ्जटी स्वर्गसे अउइया बाट। उह समयम मुख्य स्वर्गदूतक बरा आवाज अउइया बा ओ परमेश्वरक तुरही बजैलक आवाज सुन्जउइया बा। ख्रीष्टकम विश्वास कैक मुवुइयन सबसे आघ जीयाजउइया बाट। १७ तब हुँकन्हक सँगसँग प्रभुह आकाशम भेटाइक लाग हम्न जीटीह रहुइयन बद्दीम उठाजउइया बाटी। असिक हम्न सड्डभर प्रभुकसँग रहुइया बाटी। १८ उहओसें यी वचनले एक औरजहन हौसला देटीरहो।

५ हेरो भेयौ, प्रभु कैह्या ओ कत्राजुन अइहीं कना बारेम टुन्हक लाग लिखदेहपर्ना आवश्यक नैहो। २ काकरकि प्रभुक अइना दिन त रात्क चोन्वा आइअस सुटुक्क अउइया बा कैक टुहन पूरा थाहाँ बा। ३ मनै “शान्ति ओ सुरक्षा” कटीरहल समयम, गर्भवती जन्नीमनैयह व्याथा लागअस, हुँकन्हकम विपत्ती एकचोट्टे अउइया बाटन, ओ हुँक उम्क नैपैनेहुइट। ४ तर हेरो भेयौ, दुह्र यी बातक बारेम अन्धकारम नैहुइटो। उहओसें प्रभु अइना दिन टुहन चोन्वाअस चकित नैपर्ने हो। ५ काकरकि टुह्र सब जन अजरारक ओ दिनक सन्तान हुइटो। हम्न रातिक ओ अन्धकारक सन्तान नैहुइटी।⁺ ६ उहओसें हम्न औरजन्हकअस सुत नैपरट, तर जागा रहपर्ठा ओ अपन्हेह अनुशासनम ढरपर्ठा। ७ सुतुइयन रात्क सुठ ओ मत्वरेन फे रात्क जो मत्वार हुइठ। ८ तर हम्न त दिनक सन्तान हुइलकओसें, हम्न अनुशासनम पलरही। विश्वास ओ प्रेमह छातीपाताअस, ओ मुक्तिक आशह टोपअस पहिर्क सुरक्षित रही। ९ काकरकि परमेश्वर हमारम आपन रिस झारक लाग नाहीं, तर प्रभु येशू ख्रीष्टद्वारा हमन मुक्ति देहक

⁺५.५ यी सन्दर्भम अजरार कलक धार्मिकता, ज्ञान, मुक्ति या परमेश्वर हुइसेकी।

४.१५-१७ - १ कोर १५:५१-५२. ५.२ - मत्ती २४:४३; लुक १२:३९; २ पत्र ३:१०.

५.८ - यशै ५९:१७; एफि ६:१३-१७.

लाग रोज़लह। १० येशू हमार लाग मुल ताकि हम्र चाहा जीटीह रही, चाहा मुवल रही, हम्र उहाँकसँग जीएपाई। ११ उहओसेँ एक औरजहन उत्साह देना ओ विश्वासम बलगर बनैना काम करो, जौन काम दुह कर्टी फे बाटो।

पावल ख्रीष्टीयन जीवन परमेश्वरह आदर देना हिसाबक हुइपठा कैक सिखैठ

१२ हेरो भैयौ, हम्र बिन्ती करटी, कि टुन्हक बीचम दिलोज्यानले प्रभुक काम कर्ना ओ टुहन निर्देशन देना अगुवन आदर करो। १३ हुँकन्हक कर्लक कामक लाग हुँकन प्रेमसे धेर आदर सम्मान करो। ओ एक आपसम मेलमिलापम रहो।

१४ हेरो भैयौ, अलछ्ही मनैन चेतावनी देओ, हरेस खैना मनैन साहस देओ, कमजोर मनैन सहायता करो, ओ सबजहनसे सहनशीलता देखाओ कैक हम्र टुहनसे बिन्ती करटी। १५ खराबीक बदला खराबी कुइ फे जिन कर, तर एक औरजन्हक ओ सबजन्हक भलाई कर्ना कोसिस करो।



छातीपाता ओ टोप पहिरल सिपाही (५.८)

१६ सड्ड आनन्दित रहो। १७ प्रार्थना कर्टीरहो। १८ सब परिस्थितिम धन्यवाद चहाओ, काकरकि दुह ख्रीष्ट येशूकम विश्वास करइयन्हक लाग परमेश्वरक इच्छा यिह हो।

१९ पवित्र आत्मक कामह जिन रोको। २० अगमवाणीह हेल्हा जिन करो। २१ तर सब कहल बातक जाँच करो ओ असल बातह पकलरहो। २२ सब किसिमक खराबीमसे अलग रहो।

२३ शान्ति देहुइया परमेश्वर अपन्हे दुहन सम्पूर्ण हिसाबले पवित्र बनैहीं, ओ हमार प्रभु येशू ख्रीष्ट फेदोस्र नैआइटसम दुन्हक आत्मा, प्राण⁺ ओ शरीर निर्दोष ह्वाए कना हमार आशा बा। २४ परमेश्वर जो यी सब करइया बाट, काकरकि दुहन बलुइया परमेश्वर विश्वासयोग्य बाट।

२५ हेरो भैयौ, हमार लाग फे प्रार्थना कैदेहो। २६ सबजहन पवित्र प्रेमले जयमसिह करहो।

२७ मै दुहन प्रभुक नाउँम आज्ञा देहटुँ, कि यी चिठी पहर्क सबजहन सुनादेहो।

२८ हमार प्रभु येशू ख्रीष्टक अनुग्रह दुन्हकसँग पलरह।

⁺५.२३ आत्मा, प्राण: बाइबलम आत्मा ओ प्राण अल्यैना मुस्किल बात हो। उ दुनु चिजह सँगसँग व्यक्तिक एकटो द्याख नैसेकिजना भागक रुपम बुझ सेकिजटा। उ दुनु चिजह 'मन' जसिन चिज कैक बुझ सेकिजटा।

थेसलोनिकीहुँकन

पावलक लिखल द्वासर चिठी

चिठीक परिचय

थेसलोनिकीहुँकन पैल्ह चिठी लिखलक कुछ समय पाछ पावल हुँकन द्वासर चिठी लिखलह। पावलक पैल्ह लिखल चिठीले कुछ विषयम त काम करल। उदाहरणक लाग, उ पैल्हक चिठीम आपन नियत, उद्देश्य, व्यवहार ओ सन्देशम छलकपट नैरहल बात लिखल, जौन बात हुँकाहार लिखल द्वासर चिठीम दोह्याइल नैहो। तर पैल्हक चिठीम लिखल हरेक विषय थेसलोनिकीहुँकन मजासे पालन नैकरल जसिन देखपठा।

थेसलोनिकी मण्डलीम प्रभु येशू ख्रीष्ट फेदोस्र अइना विषयम वादविवाद रलहन। उ वादविवादक कारण मण्डलीम समस्या होरलहन। हुइना त, येशू ख्रीष्ट फेदोस्र अइना विषयम पावल पैल्हके चिठीम लिखलह। तर पैल्हक लिखल चिठीले उ वादविवाद समाधान नैहुइलन जसिन देखपठा। उहओसे, पावल हुकन्हक बुझाइह सुधार करक लाग द्वासर चिठी लिखलह। पावल यी चिठीम येशू ख्रीष्ट अवस्य फेदोस्र अउइया बाट ओ सबजन्हक न्याय करुइया बाट, तब हरेक व्यक्ति आपन करल काम अनुसारक फल पउइया बा कैक बटोइठ। तर यी हुइनासे आघ व्यवस्था भङ्ग कर्ना व्यक्ति आक अपन्हेह परमेश्वर घोषणा करुइया बा, ओ चमत्कार फे देखुइया बा कना बात चिठीम उल्लेख कैगिल बा।

पावल द्वासर चिठीम धेरजसिन येशू ख्रीष्ट फेदोस्र अइना बारेम लिखलह। थेसलोनिकीहुँकन येशू ख्रीष्ट फेदोस्र अइना बारेम गलती बुझलक कारण कुई कुई अलछी होरलह। पावल हुँकन काम कर्ना आपन उदाहरण पालन कर कैरखल ओ अटेर कर्ना मनैनसे करपर्ना व्यवहारक बारेम फे निर्देशन देरखल। जे होस्, पावल यी चिठीम विश्वासीहुँकन जीवनम दुखकष्ट परिआगैलसे फे खुशिक खबरम अडिग रहपर्ना ओ आपन खाइक लाग अपन्हे कमाइ पर्ना आवश्यकता देखारखल।

विषयसूचि

पावल थेसलोनिका शहरम रहल मण्डलीह चिठी लिखठ (१:१-२)

पावल येशू ख्रीष्ट फेदोस्र अउइया बाट ओ न्याय करुइया बाट कैक बटोइठ
(१:३-१२)

पावल येशूसे आघ व्यवस्था भङ्ग करुइया व्यक्ति अउइया बा कैक सिखैठ
(२:१-१२)

पावल विश्वासीहुँक़्र खुशिक खबरम अडिग रहपठा कैक सिखैठ
(२:१३-१७)

पावल विश्वासीहुँक़नसे प्रार्थनक लाग अतुरोध कठ (३:१-५)

पावल सब जन काम करपठा कैक सिखैठ (३:६-१५)

चिठीक अन्तिम भाग (३:१६-१८)

पावल थेसलोनिका शहरम रहल मण्डलीह चिठी लिखठ

१

हमार परमेश्वर बाबा ओ प्रभु येशू ख्रीष्टक थेसलोनिकाम रहल मण्डलीह हम्र पावल, सिलास ओ तिमोथी यी चिठी लिखटी।⁺ २ परमेश्वर बाबा ओ प्रभु येशू ख्रीष्ट दुँहन अनुग्रह[†] ओ शान्ति देहीं।

पावल येशू ख्रीष्ट फेदोस अउइया बाट ओ न्याय करुइया बाट कैक बटोइठ

^३ हेरो भैयौ, हम्र टुन्हक लाग परमेश्वरह धन्यवाद चहैही पठा। ओ यी ठीक फे हो, काकरकि टुन्हक विश्वास एकदम धेर बाहल बा ओ एक आपसम दुह हरेकजन्हक प्रेम फे झन्झन् बहटीगैरहल।^४ उहओसे हम्र टुन्हक बारेम परमेश्वरक और मण्डलीम गर्व कैक बोळ्ठी। हम्र खास कैक सतावट ओ दुखकष्टम टुन्हक सहना शक्तिक ओ विश्वासक बारेम गर्व कठीं।

^५ परमेश्वर यह दुखकष्टह प्रयोग कैक आपन न्याय प्रमाणित करुइया बाट। उहाँ दुहन उहाँक राज्यम जैना योग्य बनैटीबाट। ओक्र लाग त दुह दुख भ्वागटो।^६ परमेश्वर ठीकसे न्याय कठ, उहाँ दुहन दुख देहुइयन दुख देहुइया बाट,^७ ओ दुह दुख भोगुइयन ओ हमन सुख देहुइया बाट। यी काम तब हुई, जब प्रभु येशू आपन शक्तिशाली स्वर्गदूतन्हकसँग आगिक लहरम स्वर्गमसे देखपरहीं।^८ परमेश्वरह नैचिहन्ना मनैन ओ हमार प्रभु येशू ख्रीष्टक बारेमा सुनागैल खुशिक खबरह नैतेर्ना मनैन उहाँ दण्ड देहुइया बाट।^९ हुँक प्रभुक उपस्थिति ओ उहाँक शक्तिशाली तेज अजरारमसे निक्रावापैहीं ओ सड्डभरिक लाग नाश कैजहीं।^{१०} यी तब हुई, जब प्रभु येशू फेदोस अइहीं। उ दिन उहाँ आपन पवित्र मनैनसे ओ सारा विश्वासीनसे आदर ओ प्रशंसा पउइया बाट। उ बगालम दुह फे रबो, काकरकि दुह हमार कहल बातम विश्वास कलों।

^{११} उहओसे हम्र टुन्हक लाग प्रार्थना कैदेटीरठी। परमेश्वर दुहन जौन जीवनक लाग बलैल, उहाँ दुहन वाकर योग्य बनैहीं, ओ उहाँक शक्तिले हरेक असल उद्देश्य ओ विश्वासक काम करक लाग सहायता करहीं कैक हम्र उहाँसे कठी।^{१२} तब टुन्हक चालचलनक कारण हमार प्रभु येशूक नाउँक आदर हुइया बाटन, ओ

⁺ १.१ १ थेसलोनिकी १:१ म रहल फुटनोट हेरी।

[†] १.१ अनुग्रह: १ थेसलोनिकी १:१ म रहल फुटनोट हेरी।

टुह फे उहाँकसँग आदर पउइया बाटो। हमार परमेश्वर ओ प्रभु येशू ख्रीष्टक अनुग्रहक कारणले यी सब सम्भव बा।

पावल येशूसे आघ व्यवस्था भङ्ग करइया व्यक्ति अउइया बा कैक सिखैठ

२ हेरो भैयौ, आब हमार प्रभु येशू ख्रीष्ट फेदोस्र अइना ओ हम्र उहाँह भेटाइक लाग जम्मा हुइना विषयम स्पष्ट हुई। हम्र टुहनसे बिन्ती करटी कि, २ यदि कुई प्रभुक अइना दिन पुगरलन कही कलसे, टुह चिन्ता जिन करहो या विचलित जिन हुइहो। उ दिनिक बारेम हम्र अगमवाणी ब्वालबेर, या प्रचार करबेर ओसिक कली हँ कैक कुई दाबी कर सेकठ, या कुई हमार नाउँ पार्क लिखल चिठी पठाइ फे सेकठ, तर हँकन्हक बातम विश्वास जिन करहो। ३ हँक ज्या कलसे फे, हँकन्हक उल्कम जिन लगहो। काकरकि परमेश्वरक विरोधम अन्तिम विद्रोह नैहुइसम, ओ व्यवस्था भङ्ग करइया ओ नाश हुइइया व्यक्ति नैदेखपरट्सम उ दिन अउइया नैहो। ४ उ व्यक्ति मनै परमेश्वर मान्क पुज्जक सब चिजिक विरोध करइया बा ओ अपन्हेह सबसे उच्च घोषणा करइया बा। अत्र केल नैहोक, उ परमेश्वरक मन्दिरम समेत बैटुइया बा ओ "परमेश्वर मैहे हुइहुँ" कहइया बा।

५ यी विषयम त, टुन्हक्केसँग रहलम मै टुहन सिखैनहुँ। टुहन याद नैहो का? ६ दिन पुगलसे उ दुष्ट देखपरइया जो बा। आब का चिज ओहीह रोकलबाटस् कना बात त टुह जन्लबाटो। ७ व्यवस्था भङ्ग करइया गोप्य रुपम पैल्हहँ आपन काम शुरु कैराखल। तर ओहीह रोकुइयह नैहटाजाइट्सम उ रोकजैलरहुइया बा। ८ तबदोस्र व्यवस्था भङ्ग करइया व्यक्ति देखपरइया बा। तर प्रभु येशू तेज अजरारम आक आपन मुहक एक्क साँसले ओहीह नाश कैदेहुइया बाट। ९ व्यवस्था भङ्ग करइया व्यक्ति शैतानक शक्ति लेक अउइया बा, ओ सब किसिमक चमत्कार ओ अचम्म-अचम्म काम कर्क बहाना बनुइया बा। १० उ हरेक किसिमक छल कैक नाश हुइना सबजहन धवाखा देहुइया बा, काकरकि हँक मुक्ति देना सत्य वचनह प्रेम कर ओ स्वीकार कर नैचहल। ११ उहओसे, हँक झुठ बातम विश्वास करहीं कैक परमेश्वर हँकन भर्मैना शक्ति पठुइया बाट। १२ हँक सत्य वचनम विश्वास नैकैक दुष्ट चालचलनम खुसी हुइलकओसे हँक दोषी ठहाजउइया बाट।

पावल विश्वासीहुँक खुशिक खबरम अडिग रहपठा कैक सिखैठ

१३ प्रभुक प्रेम करल भैयौ, हम्र टुन्हक लाग परमेश्वरह सड्ड धन्यवाद चहैही पठा, काकरकि परमेश्वर शुरुहम दुहन मुक्ति देहक लाग रोज्ल। उ मुक्ति दुहन पवित्र बनैना पवित्र आत्मासे ओ सत्य बातम टुन्हक करल विश्वाससे अइठा। १४ हम्र दुहन प्रचार करल खुशिक खबरह माध्यम बनाक परमेश्वर दुहन बलैलह। दुह फे हमार प्रभु येशू ख्रीष्टकअस आदर पाइसेको कैक उहाँ दुहन बलैलह। १५ उहओसे, हेरो भैयौ, विश्वासम बलगर होओ, ओ चाहा मुहक वचनले ह्वाए, चाहा लिखल चिठीले ह्वाए - हमार सिखाइल बात पकलरहो। १६ आब हमन प्रेम करइया ओ अनुग्रहद्वारा हमन सड्डभर उत्साह ओ असल आशा देहुइया हमार प्रभु येशू ख्रीष्ट अपन्हे ओ परमेश्वर बाबा १७ दुहन उत्साह देटीरहीं, ओ हरेक असल काम ओ वचनम दुहन शक्ति फे देटीरहीं।

पावल विश्वासीहुँकनसे प्रार्थनक लाग अनुरोध कठ

३ आखिरम, हेरो भैयौ, हमार लाग फे प्रार्थना कैदेहो, ताकि प्रभुक वचन, टुन्हक बीचम फैललअस, चारिओर झट्ट फैल स्याक ओ याकर धेर आदर ह्वाए। २ ओ हम्र खराब ओ दुष्ट मनैनसे छुटकारा पाइसेकी, काकरकि सब जन त विश्वास नैकटी। ३ तर प्रभु विश्वासयोग्य रलकओसे उहाँ दुहन बलगर बनइया बाट ओ दुष्टसे[†] रक्षा करइया बाट। ४ ओ प्रभुक कारणले दुह हमार कहल बात मन्टीबाटो ओ मन्टीरहुइया बाटो कैक हमार विश्वास बा। ५ प्रभु जो दुहन परमेश्वरक प्रेम बुझना ओ ख्रीष्टकअस धैर्य धारण कर्ना शक्ति देहीं।

पावल सब जन काम करपठा कैक सिखैठ

६ हेरो भैयौ, प्रभु येशू ख्रीष्टक नाउँम हम्र दुहन आज्ञा देहटी, कि अल्छी विश्वासीनसे ओ हमार सिखाइल वचन अनुसार नैचलुइयनसे अलग रहो। ७ काकरकि कसिक हमार देखासिकी करपठा कना बात त दुह जन्लबाटो। हम्र टुन्हकसँग रहलम अल्छी नैरलही, ८ पैसा बिना तिर्ल हम्र केकरो घर फे नैखैली। बेनसे, दुह किहुह फे भार जिन पर कैक हम्र रातदिन खटक काम कर्ली। ९ सहायता पैना हमार हक नैहोक नैहो, तर टुन्हक बीचम एकठो उदाहरण

[†] ३.३ शैतानसे कहल हो।

बनक लाग हम्न ओसिक कर्लही। १० "यदि कुई काम नैकरट् कलसे, उ खैना फे जिन खाए" कैक त हम्न दुन्हक्केसँग रहलम कलही।

११ दुह्ममध्ये कुई कुई त अल्ल्ही बाटो कैक सुन्मिल्ला। हुँक कामक नाउँम एकठो सिँका फे नैउठैट, तर आनक कामम भर लबलब-लबलब हाँठ करैठ। १२ हम्न असिन मनैन प्रभु येशू ख्रीष्टक नाउँम आज्ञा ओ अर्ती देहटी, कि हुँक आपन खाइक लाग अपन्हे खुरुखुरु काम करहीं। १३ हेरो भैयौ, भलाई कर्ना कामम पाछ जिन हटो।

१४ यी चिठीम हमार लिखल वचन जे पालन नैकरट्, ओहीह चिन्हलरहो, ओ ओहीसे संगतऽ जिन करो, त उ अपन्हे शरमम परी। १५ तर फे ओहीह शत्रुऽ जिन थनहो, बेनसे भैया मान्क चेतावनी देहो।

चिठीक अन्तिम भाग

१६ शान्ति देहुइया प्रभु अपन्हे हर समयम हर किसिमले दुहन शान्ति देटीरहहीं। प्रभु दुह सबजन्हकसँग रहीं।

१७ मै पावल आप्पन हाँठले जयमसिह लिख्क पठाइँटुँ। म्वार सक्कु चिठीक चिनारी यह हो। मै असहँक लिख्ँटुँ।

१८ हमार प्रभु येशू ख्रीष्टक अनुग्रह दुह सबजन्हकसँग पलरह।

शब्दक अर्थ

(नोट: ठूल अक्षरम लिख्गैल् थारु शब्दक पाछ, नेपाली बाइबलमसे फरक बा कलसे, कोष्ठम नेपाली शब्द फे देगैल्बा।)

अगमवक्ता /अगमवाणी

अगमवक्ता कलक परमेश्वरक बलाइल व्यक्ति अर्थात् परमेश्वरक तर्फसे बोल्ना व्यक्ति या परमेश्वरक प्रवक्ता हुइटा। अगमवक्तह कबुकाल “परमेश्वरक जन” (व्यवस्था ३३:१; १ शमूएल ९:६), ओ कबुकाल “परमेश्वरक दास” (२ राजा १०:१०; १७:१३) कैगिल् बा। हुँकन्हक ब्वालल् वचनह अगमवाणी कैजाए। अगमवक्तहुँक परमेश्वरक स्वभाव, इच्छा, योजना, अर्ती, चेतावनी, ओ न्याय सम्बन्धी वचन मनैन देहँट। हुँक परमेश्वरसे पाइल वचन मनैन देना क्रमम कबुकाल भविष्यम हुइना घटनक बारेम फे कहँट। उदाहरणक रुपम एलीशा (२ राजा ६:१२) ओ आमोस (आमोस १ ओ २ अध्याय)। कुछ अगमवक्ताहुँक परमेश्वरक वचन लिख्ल। पुरान नियमम हुँकन्हक लिखल किताब धेर बा।

उ समयम झुटा अगमवक्ताहुँक फे रलह। हुँक आपन मनक बात बट्वाइँट, तर परमेश्वरसे पाइल वचन कैक दाबी करँट। परमेश्वर हुँकन नैबलैललन तर हुँक अपन्हे अगमवक्ता बनलह। हुँक मनैन परमेश्वरक आज्ञापालन कर लगाइक लाग नाहीं तर आपन स्वार्थी इच्छा पूरा करक लाग वचन ब्वालँट।

जे होस्, परमेश्वरक अगमवक्ताहुँक राजदरवारम सल्लाह देना काम करँट। हुँक देशम न्याय, नैतिकता ओ पवित्रता कायम हुइपर्ना बातम जोड्देहँट। हुँक देशम आत्मिक अगुवक रुपम धेर महत्वपूर्ण देन देरख्ल। लौव नियमम फे अगमवक्तन्हक सेवा उल्लेख कैगिल् बा। पवित्र आत्मा विश्वासीहुँकन मण्डलीक हितक लाग अगमवाणी बोल्ना वरदान देठ (१ कोरिन्थी १२:१०)। पैल्ह शताब्दीम मण्डली स्थापना कर्ना कामम प्रेरितन्हक सँगसँग अगमवक्ताहुँक फे धेर देन देल।

अनुग्रह

बाइबलम अनुग्रह कलसे क्षमादान, मुक्तिदान, अचूक प्रेम, अपार कृपा आदि विषयह समेट्ठा। निगाहा, दया आदि शब्द फे अनुग्रहक अर्थ देठा। परमेश्वरक अनुग्रह कारणले हम्म मुक्ति पैठी (एफिसी २:८ तीतस २:११)। हम्म पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठैल (रोमी ५:८)। येशूक मृत्युद्वारा परमेश्वर आपन पाप स्वीकार कर्ना ओ उहाँकम विश्वास कर्ना मनैन क्षमा देठा। मुक्ति कुई फे कमाइ नैस्याकट्, यी त परमेश्वरक अनुग्रहस्वरुप मनैन देगैल वरदान हो।

येशूक सिखाइल वचनम फे धेरजसिन अनुग्रहक सिद्धान्त पाजैठा। जस्तै – काम करुइयन्हक आहानम, डान्चे समय केल काम करुइयन फे पूरा ज्याला पैठ (मत्ती २०:१-१६), बराभ्वाजक आहानम, निउँता पैना असम्भव मनै फे भ्वाजम सहभागी हुइ पैठ (लूका १४:१६-२४), हेराइल छावक आहानम, छोट्की छावा दण्ड पैना योग्यक रलसे फे घरमा स्वागत कैजिठा (लूका १५:११-२४)।

पावल धेरजसिन चिठीक शुरुम अभिवादन करबेर ओ अन्त्यम आशिषक कामना करबेर “अनुग्रह” शब्द प्रयोग कैरखल। पावल, रोमी १:१६-४:२५ म, मनै पापी बाट ओ परमेश्वरसे दूर होरल, तर परमेश्वर आपन अनुग्रहद्वारा हुँक कबु फे पाप नैकरलअस हुँकनसे व्यवहार कठ। हम्म पापी ओ परमेश्वरक विरोधी रहलम फे परमेश्वर आपन छावा येशू ख्रीष्टह हमन मुक्ति देहक लाग पठैल (रोमी ५:८)। परमेश्वरक अनुग्रहक कारणले हम्म मुक्ति पैठी (एफिसी २:८; तीतस २:११)।

आत्मा

मनैन्हक अभौतिक पक्षक बारेम बात बट्वाइक लाग बाइबलम विभिन्न शब्द चलाइल बा, जस्तै: विचार (यूहन्ना १३:२१), समझ (यशैया २९:२४), इच्छा (यर्मिया ५१:११), ओ चरित्र आदि। मनैयक द्याख नैसेक्जिना असिन पक्षक बारेम व्यक्त करक लाग प्रयोग हुइना एकठो शब्द ‘आत्मा’ फे हो। याकर लगघक और शब्द ‘प्राण’ हो। यी दुनु शब्द ‘मन’ जसिन चिजसे एकदम धेर सम्बन्धित बा।

यी शब्द मनैन्हक आत्मा, भूतन्हक आत्मा, स्वर्गदूत ओ ईश्वर या परमेश्वर कना अर्थम फे प्रयोग हुइल् बा। यी शब्द मिलाक परमेश्वरह पवित्र आत्मा ओ भूतप्रेतन दुष्ट आत्मा कैक कैगिल बा। शरीर मुठा तर आत्मा नैमुवट्। मनै मुल कलसे मुवल शरीरम आत्मा, साँस या जीवन-शक्ति नैरटन। उ आत्मा कि त स्वर्ग जैठा, कि त नरक जैठा।

खुशिक खबर (सुसमाचार)

साधारण हिसाबले खुशिक खबर कलक मजा खबर हो। तर बाइबलम, खुशिक खबर कलसे एकठो विशेष अर्थ लगठा। धेर वर्ष आघ, परमेश्वर इस्त्राएलीन मुक्ति देना बाचा कैरखलह (यशैया ९:१-७)। परमेश्वर उ बाचा येशू ख्रीष्टकम पूरा कर्ल ओ सक्कुजन्हक लाग मुक्तिक ड्वार खोलदेल (कलस्सी १:१३)।

खुशिक खबर कलक यहि हो कि येशू ख्रीष्ट सारा संसारह मुक्ति देना परमेश्वर हुइट, ओ उहाँ मनैन पापमसे मुक्ति दिहक लाग यी संसारम अइल (१ पत्रुस २:२४; रोमी ६:२३)। पापमसे मुक्ति पाइक लाग, मनै येशू ख्रीष्टकम विश्वास कर्ना बाहेक और कुछु कर नैपरट् (यूहन्ना १:१२; ३:१६)। मनैन्हक लाग सबसे खुशिक खबर यहि हो।

दया

दया कलक औरजन्हकम दुख, अभाव, आपतविपत परल समयम, हुँकन सहायता करक लाग मनम अइना एकठो भावना हो। यहीह कबुकाल कृपा या निगाहा फे कैजिठा। परमेश्वर गरीब मनैन, टुवर लर्कन, विधवन ओ अरदेशीपरदेशीन दया करपर्ठा कैक आपन वचनम कैरखल (भजनसंग्रह १४६:९; हितोपदेश १९:१७; जकरिया ७:९-१०; मीका ६:८)। परमेश्वर आपन करल सारा सृष्टिम दया कर्लबाट (भजनसंग्रह १४५:९), ओ उहाँ हमन दया कर्लक कारण हम्म मुक्ति पारखली (एफिसी २:४; तीतस ३:५)। येशू आपन चलन कल, “टुन्हक स्वर्गक परमेश्वर बाबा दयालु रहलअस, टुह फे दयालु होओ” (लूका ६:३६)। एकठो मुवमुव मनैयह देखक सामरीया क्षेत्रक मनैयह दया लगलन् (लूका १०:३३)। दया एकठो भावना हो, जेहीह कामले ओ व्यवहारले व्यक्त कैजिठा।

परमेश्वर

परमेश्वर आत्मा हुइलकओसे, उहाँह द्याख नैसेक्जाइट् (रोमी १:२०; कलस्सी १:१५; १ तिमोथी १:१७; ६:१५-१६)। तर फे बाइबलम का लिखल बा कलसे उहाँ बोल्ठ (उत्पत्ती ३:८-१९; ९:१६; मर्कूस १:११), सुन्ठ (अय्यूब ३४:२८; भजनसंग्रह ११६:१), देख्ठ (भजनसंग्रह ३३:१३-१४; हितोपदेश ५:२१), रिसैठ (प्रस्थान २२:२४; रोमी १:१८, प्रेम कर्ठ (यूहन्ना ३:१६), ओ सोगैठ (हिब्रू ४:१५-१६)। परमेश्वर एक्क समयम सब ठाउँम बाट (भजनसंग्रह १३९:७-१०; यर्मिया २३:२३-२४), उहाँ सब चिज जन्ठ (भजनसंग्रह १३९:१-४; दानियल २:२०-२२), उहाँ सक्कुनसे शक्तिशाली बाट (अय्यूब ४२:२; लूका १:३७), उहाँ सड्डभर पलबाट ओ पलरहुइयाबाट (१ तिमोथी १:१७; प्रकाश ११:१७; १५:७), ओ उहाँ कबु फे पाप नैकर्ल ओ कबु फे पाप करुइया नैहुइट (याकूब १:१३ १; पत्रुस १:१:१५)।

उहाँ स्वर्ग, पृथ्वी ओ उहिम रहल सबचिज सृष्टि कर्ल (यर्मिया ५१:१५; हिब्रू २:१०)। उहाँ मनैन्हक भलो चहठ (यर्मिया २९:११)। उहओसे परमेश्वर मनैन पापमसे मुक्ति देना योजना बनाक उह अनुसार काम कर्ल। येशू ख्रीष्टकम विश्वास कर्लसे मुक्ति पैना बात बाइबलम लिखल बा (रोमी ५:१०; हिब्रू २:१४-१५)।

परमेश्वर तीनठो व्यक्तित्वम बाट: बाबा परमेश्वर, छावा परमेश्वर, ओ आत्मा परमेश्वर (मर्कूस १:१०-११)। ख्रीष्टीयन इतिहासम यहीह त्रिएक परमेश्वर कैगिल् बा। हम्न बाइबलम का देख्ठी कलसे, हुइना त परमेश्वर तीनठो व्यक्तित्वम बाट, तर उहाँ एक्कठो परमेश्वर हुइट, तीनठो परमेश्वर नैहुइट (व्यवस्था ६:४)।

परमेश्वरक छावा (परमेश्वरको पुत्र)

परमेश्वर तीनठो व्यक्तित्वम बाट: परमेश्वर बाबा, परमेश्वरक छावा, ओ परमेश्वरक आत्मा। येशू ख्रीष्ट परमेश्वरक छावा हुइटा। परमेश्वरक छावा रलसे फे, उहाँ परमेश्वर बाबक सृजाइल नैहुइटा। कन्या मरियमक कोखिमसे जरमक उहाँ परमेश्वरक छावा हुइलक नैहुइटा। उहाँ सड्डभर परमेश्वरक छावा पलबाट ओ पलरहुइयाबाट। उहाँ अधिकार, शक्ति, आदर, ओ अस्तित्वम

परमेश्वर बाबसे कम नैहुइटा। उहाँकम परमेश्वरकम रहपर्ना गुण रलकओसें, उहाँ परमेश्वरऽ हुइटा (यूहन्ना १:१-२; कलस्सी १:१५-२०; हिब्रू १)।

येशू ख्रीष्ट मनैया होक यी संसारम जरम लेल त, उहाँकम मनैन्हक गुण फे थपगैलन। उहाँ परमेश्वर बाबक आज्ञाकारी होक जील ओ क्रूसम मुल। मनैया हुइलकओसें, उहाँ क्रूसम मुवबेर सारा मनैन्हक प्रतिनिधित्व कर्ल ओ सबजन्हक पाप बोक्ल (हिब्रू २:५-१८)।

परमेश्वरक राज्य (परमेश्वरको राज्य)

परमेश्वरक राज्य संसारक राज्यअस नैहो। उहाँक राज्यम भौगोलिक सिमा नैरहट, राजनैतिक पार्टी नैरहट, वर्गीय ओ जातिय भेदभाव नैरहट। परमेश्वरक राज्य कलक परमेश्वरक शासन हो। उ शासनम परमेश्वर राजक रुपम शासन कठ, तर परमेश्वर निरङ्कुश शासन नैचलैटा। उ शासनम अन्याय, अत्याचार, शोषण, दमन, या भ्रष्टाचार कुछु नैहो।

उहाँक शासन त धार्मिक, न्यायिक, ओ पवित्र बाटन। उहाँ प्रेमम, शान्तिम, मिलापम, एकताम राज्य कठ (भजनसंग्रह १४५; यशैया ९:१-७)। उ राज्य मनैन्हक मनम स्थापित हुइना राज्य हो। मनम परमेश्वरक राज्य स्थापित हुइल मनै आपन जीवनम परमेश्वरह शासन कर देठ।

पवित्र आत्मा

पवित्र आत्मा कलक परमेश्वरऽ हुइटा (प्रेरित ५:३-४; २ कोरिन्थी ३:१७-१८)। येशू ख्रीष्टकम विश्वास कर्ना मनैन्हकम पवित्र आत्मा बास कठ (रोमी ५:५; ८:९)। पवित्र आत्मक सहायताले, ख्रीष्टीयनहुँक येशूह परमेश्वरक छावा कैक प्रचार कठ (प्रेरित १:८), बाइबलक वचन बुइना शक्ति पैठ (यूहन्ना १६:१३), सेवा कर्ना अगुवाइ पैठ, आत्मक फारा फराइ सेकठ, पापम नैफँस्ट, ओ लौव जीवन जीना स्वतन्त्रता पैठ (रोमी ८; गलाती ५:२२-२३)। परमेश्वरक योजना संसारम ओ मण्डलीम लागू कर्ना कामम सहायता पुगाइक लाग, पवित्र आत्मा ख्रीष्टीयनहुँकन धेर किसिमक वरदान देठ (रोमी १२:३-८; १ कोरिन्थी १२; एफिसी ४:७-१६; १ पत्रुस ४:१०-११)।

पाप

औरजन्हक हत्या कर्ना, या औरजहन सँटैना, या दुष्ट काम कर्ना केल परमेश्वरक नजरम पाप नैहो। तर बाइबलम पाप कलक सक्कु खराब विचार (जस्त: ल्वाभ कर्ना, हेल्हा कर्ना, बिह्ल मुना, घमण्डी हुइना, ओ मूर्ख हुइना) ओ सक्कु खराब काम (जस्त: बेश्या काम कर्ना, चोर्ना, हत्या कर्ना, झग्रा कर्ना, लभर्ना, ठगना, बदला लेना) हो (मर्कूस ७:२१-२२; गलाती ५:१९-२१)।

पाप परमेश्वरक विरोधम हुइना काम हो, ओ सबसे छिटिमिटि पाप काम फे परमेश्वरक नजरम नैमजा काम हो। पाप मनैन परमेश्वरसे अलगैलरठा (रोमी ६:२३)। पाप कर्लक कारण मनैन्हक जीवनम डर, शरम, ओ दुःख आइल (उत्पत्ती ३)। अत्र केल नैहोक, मनै मुव पर्ना फे हुइल् (रोमी ६:२३)।

पाप साधारण बात नै हो। वास्तवम मनै पापक बन्धनम परल बाटा। पापक यी बन्धनमसे मनै अपन्हे मुक्ति पाइ नैसेकट। यी बन्धनमसे मुक्ति पाइक लाग, मनै आपन-आपन पापी मन घुमाइपर्ठा ओ येशूकम विश्वास कैक परमेश्वरकठे आइपर्ठा (मर्कूस १:४; यूहन्ना ३:१६)।

पापमसे मुक्ति पैना कलक पापक दण्डसे बच्ना हो। हुइना त, येशूकम विश्वास करुइयन पूरा रुपम पापमसे अलगैना सम्भव नैहो, तर, परमेश्वरक आत्मक सहायताले, हुँक आपन मनह पापओर जाइ नैदेना सम्भावना भर बा। असिक, हुँक परमेश्वरक उपस्थितिम आनन्दित ओ स्वतन्त्र जीवन जीठ (रोमी ६-८)।

पावल

पावल खुशिक खबर प्रचार कर्ना कामम एक प्रभावशाली व्यक्ति रलह। उ धेर ठाउँम प्रचार कर्ल ओ मण्डली स्थापना कर्ल। उ येशू ख्रीष्टक जीवनक अर्थ मनैन बुझादेल, ओ लौव नियमम रहल १३ ठो चिठी लिखल, जेहीह पावलक लिखल चिठी कैजिठा।

पावल यहूदी जातिक व्यक्ति रलह। हुँकहीन यहूदी धर्मक बारेम धेर ज्ञान रलहन। धर्मक जोशले पावल, अपन येशू ख्रीष्टकम विश्वास कर्नासे आघ, ख्रीष्टीयनहुँकन सँटैलह। पाछ उ येशू ख्रीष्टकम विश्वास कर्ल त, संसारक विभिन्न ठाउँम जाक धेरजसिन अयहूदीन्हक बीचम खुशिक खबर प्रचार कर्ल। यी काम करबेर हुँकाहार जीवनम धेर किसिमक दुखकष्ट परिअइलन्, तर फे

उ पाछ नैहट्ल। “प्रेरितन्हक काम” कना किताबसे पावलक बारेम अप्त थप जानकारी पाइसेकठी।

प्राण

मनैन्हक अभौतिक पक्षक बारेम बात बट्वाइक लाग बाइबलम विभिन्न शब्द चलाइल बा, जस्तै: विचार (यूहन्ना १३:२१), समझ (यशैया २९:२४), इच्छा (यर्मिया ५१:११), ओ चरित्र आदि। मनैयक द्याख नैसेकिजना असिन पक्षक बारेम व्यक्त करक लाग प्रयोग हुइना एकठो शब्द ‘प्राण’ फे हो। याकर लगघक और शब्द ‘आत्मा’ हो। यी दुनु शब्द ‘मन’ जसिन चिजसे एकदम धेर सम्बन्धित बा।

प्रार्थना कर्ना

परमेश्वरसे प्रार्थना कर्ना कलक साधारण अर्थम ख्रीष्टीयनहुँक परमेश्वरसे बातचित कर्ना हो। अत्र केल नैहोक, परमेश्वरसे प्रार्थना कर्ना कलक उहाँक आराधना ओ प्रशंसा कर्ना (भजनसंग्रह १४४-१५०), उहाँह धन्यवाद चहैना (भजनसंग्रह १३६; १ थिस्सलोनिकी ५:१६-१८), उहाँसेकि उहाँक आघ आपन पाप स्वीकार कर्ना, ओ आपन पाप क्षमक लाग उहाँसे प्रार्थना कर्ना फे हो (दानियल ९:३-२३; १ यूहन्ना १:९)। परमेश्वरसे आपन घटकमीक माग कर्ना फे हो (याकूब १:५; फिलिप्पी ४:६-८)।

यदि हम्र परमेश्वरक आज्ञाकारी जीवन जीलबाटी कलसे, परमेश्वर हमार करल प्रार्थना सुन्ठ ओ वाकर उत्तर देठ (भजनसंग्रह ६६:१६-२०; हितोपदेश १५:२९)। परमेश्वरसे प्रार्थना कर्ना काम उहाँसे सम्बन्ध बहैना एकठो मजा तरिका फे हो। परमेश्वरसे प्रार्थना कर्लकओसे, उहाँकम विश्वास करल मनैन्हक जीवनम भारी-भारी शक्तिक काम हुइल बाटन (याकूब ५:१३-१८)। उहमार परमेश्वरसे प्रार्थना कर्ना ख्रीष्टयन जीवनक एकठो मुख्य भाग हो।

प्रेरित

बाइबलम, प्रेरित कलक परमेश्वरक खुशिक खबर प्रचार कर पठाइक लाग येशू ख्रीष्टक न्वाजल बार जन चेलावँ हुइट (मर्कूस ३:१४; ६:३०)। येशू ख्रीष्ट स्वर्गम उठागैल त, उहाँक कामह उह प्रेरितहुँक निरन्तरता देल। मुवलमसे

फेदोस्र जीलक येशू ख्रीष्टह हुँक आपन आँखिले देख्लह ओ परमेश्वरक आत्मले भरलरलह। हुँक ठाउँ-ठाउँम मण्डली स्थापना कर्ल, ओ मनैन परमेश्वरक वचन सिखैल। यी बारजन बाहेक पावल फे पाछ एकठो प्रेरित बन्ल।

मण्डली

मण्डली कलक ख्रीष्टियनहुँकन्हक भेला हो। उ भेलम हुँक परमेश्वरक प्रशंसा ओ आराधना कर्ठ, संगती कर्ठ, एक औरजहन उत्साह देठ, ओ परमेश्वरक वचन सुन्ठ आदि (प्रेरित २:४२-४७)। असिक हुँक विश्वासम बलगर ओ परिपक्व हुइटी जैठ। अगुवन धेर जसिन समयम परमेश्वरक वचनमसे सिखैठ। हम्न बुझपर्ना महत्वपूर्ण बात का हो कलसे, मण्डली कलक मण्डली घर नैहो, तर येशू ख्रीष्टकम विश्वास करल मनैन्हक विशेष भेला हो।

मुक्ति

मुक्ति कलक खतरामसे बँचाजैना ओ सुरक्षित ठाउँम परिपक्व रुपले जीए पैना हो। बाइबलम मुक्ति कलक पापक बन्धनमसे ओ परमेश्वरक दण्डसे छुटकारा पैना, (यूहन्ना ३:१६; रोमी ६:२३), ओ लौव जीवन पैना हो। हम्न पापक बन्धन ओ परमेश्वरक दण्डसे छुटकारा पाइल यी लौव जीवन जीए सेक्ठी (रोमी ६:१-१३; ८:१, ३२-३४; कलस्सी १:२२), ओ परमेश्वरक चाहल अनुसार यी जीवन जीएक लाग शक्ति फे पैठी। (रोमी ८; एफिसी ५:१८; कलस्सी १:९-१२)। बाइबलक हिसाबले मनैन पापमसे बँचाइ सेक्ना व्यक्ति येशू ख्रीष्टकम विश्वास कैक केल मुक्ति पाजैठ। (प्रेरित ४:१२; १ तिमोथी २:५)।

मुवलमसे फेदोस्र जीना (पुनरुत्थान)

येशू क्रूसम मुल त, मनै उहाँक शरीरह एकठो बरानक पत्थ्रा खोल्क बनाइल गन्यम ढर्ल (मर्कूस १५:४३-४६)। पाछ, येशू फेदोस्र जीगैल। यी चाहिँ और जुनी लेक अइना काम नैहो (अर्थात् च्वालाला फेर्ना काम फे नैहो), भेष बदलना काम फे नैहो। तर मुनासे आघ येशूक उमेर, रुप, रङ्ग जसिन रलहन, मुवलमसे फेदोस्र जील त, उह उमेरम, उह रुप, रङ्गम उह येशू जीटी बाट कना बात हो।

संसारक पूरा इतिहासम सबसे महत्वपूर्ण घटना येशू ख्रीष्ट मुवलमसे फेदोस्र जीयल घटना हो (मर्कूस १६:१-८)। इतिहासक अन्त्यम सब मनै मुवलमसे फेदोस्र जीजउइयाबाट - येशूकम विश्वास कर्ना मनै सबजन स्वर्ग जउइयाबाट, विश्वास निकरुइयन भर नरकम जउइयाबाट। स्वर्ग जउइयन्हक शरीरम, भूतपन्यात लाग नैसेक्ट, न्वागबिन्वाग नैलागट्, पाप नैरहट्, ओ कुइ फे मुवाइ नैस्याकट् (१ कोरिन्थी १५:५१-५७)।

यहूदी (हिब्रू /इस्राएली)

यहूदी, हिब्रू, या इस्राएली एक्क जतिक मनैन जनैना नाउँ हो। पुरान नियमम सबसे पैल्ह हिब्रू अब्राहाम रलह (उत्पत्ती १४:१३), ओ हुँकाहार सन्तान फे हिब्रू हुइल। हुँकन्हक बोल्ना भाषह फे हिब्रू कैजाए ओ येशूक समयम फे हुँक उह भाषा ब्वालँट् (यूहन्ना १९:२१; प्रेरित २२:२)। आम्हीसम उ भाषा बोलजैठा।

अब्राहामक नट्या याकूब रलह (उत्पत्ती २५:१९-२४)। याकूबक नाउँ पाछ जाक इस्राएल हुइलन (उत्पत्ती ३२:२९)। इस्राएलक बार भाइ छावन रलहन (उत्पत्ती ३५:२२-२६)। उह बार भाइ छावन्हक सन्तान बार जाति हुइल, ओ हुँक एकमुष्ठ रुपम इस्राएली कैक चिन्हगैल। पाछ जाक हुँक यहूदी कैक फे चिन्हगैल।

वास्तवम “यहूदी” शब्द यहूदामसे आइल हो। याकूबक बार भाइ छावनमध्येम एकठो छावक नाउँ यहूदा रलहन। यहूदक बसोबास करल क्षेत्रक नाउँ फे यहूदा हुइल। तर उ ठाउँ बार कुल रहल देशक एक भाग केल रह। पाछ हुँक उत्तरी राज्य ओ दक्षिणी राज्य कैक दुई भाग हुइल (हेरी १ राजा १२ अध्यायसे पाछओर)। उत्तरी राज्यह इस्राएल कैगिल्, दक्षिणी राज्यह यहूदा कैगिल्।

पाछ जाक अशूर देश उत्तरी राज्यह हमला कैक लैगिलन। तबदोस्र उ उत्तरी राज्यक सब इस्राएलीहुँकन अशूर देशम लैगिल, ओ आपन मनैन उत्तरी राज्यम बसोबास कर लगैल। उ ब्याला दक्षिणी राज्य केल बाँचल, ओ यहूदा देशक मनैन ‘यहूदी’ कहलगलन। यहूदा राज्यह, धेर पाछ, ग्रीकहुँकन्हक ओ रोमीहुँकन्हक समयम, यहूदीया कैगिल्। हुँकन्हक धर्मह यहूदी धर्म कहँट्। उ ब्याला “इस्राएलक सन्तानन” एकमुष्ठ बुझाइक लाग, कबुकाल “इस्राएली” कहँट् ओ कबुकाल “यहूदी” कहँट्।

आजकाल फे इजराएल देशम ओ संसारक धेर मुलुकम यहूदीहुँक पलबाट। हुँक आम्हीसम फे पुरान नियमक धेर बात ओ हुँकन्हक आपन परम्परा मन्टीरठ।

येशू ख्रीष्ट

हुइना त येशूक अस्तित्व सडुभर पलबाटन, तर फे उहाँ लगभग २००० वर्ष आघ इस्राएल देशम मनैया होक जर्मलह। येशू ख्रीष्ट एकमुष्ठ रुपम बाइबलक ओ ख्रीष्टीय विश्वासक केन्द्रीय पात्र हुइट। उहाँ एकठो मनैया केल नैरलह, तर परमेश्वर फे रलह। उहओसे उहाँकम परमेश्वरक गुण रलहन। उहाँ मनैया होक जर्मल त, उहाँकम रहल परमेश्वरक गुण नैहेरैलन (यूहन्ना १:१-२; कलस्सी १:१५-२०; हिब्रू १)। असिक उहाँ परमेश्वर त पलरलह ओ उह समयम मनैया फे हुइल (फिलिप्पी २:५-११)। उहाँ मनैया होक जर्मलसे फे, उहाँकम पाप स्वभाव नैरलहन। उहाँ धेर स्वभाव पापम फँस्ना अवस्थम पर्ल, तर पापम कबु फे नैफँस्ल (हिब्रू ४:१४-१६)।

परमेश्वरक राज्य आइल देखैटी, येशू खुशिक खबर प्रचार कर्ल ओ उ राज्यम प्रवेश पाइक लाग आपन-आपन पापी मन घुमाक परमेश्वरकठे आइपर्ना बात सिखैल (मर्कूस १:१५)। मनैन पापमसे मुक्ति दिहक लाग, परमेश्वरक योजना अनुसार उहाँ क्रूसम मुल। उहाँक मुवल शरीरह मनै एकठो गन्यम ढर्ल। वाकर तीसर दिन, उहाँ मुवलमसे फेदोस्र जीगैल (मर्कूस १५-१६)। फेदोस्र जीलक चालीसवाँ दिनम, धेर मनै देखैटी-देखैटी, उहाँ स्वर्गम उठागैल (लूका २४:५०-५२)। आजकाल उहाँ सर्वशक्तिमान परमेश्वरक दाहिन पाञ्जर बैठल बाट (हिब्रू १:३; १०:१२)।

येशू एक दिन आपन राज्य स्थापना कर फेदोस्र अउइयाबाट। तबदोस्र येशू ख्रीष्टकम विश्वास करल मनै स्वर्गम सडुभर परमेश्वरकसँग रहपैहीं, तर उहाँकम विश्वास नैकरल मनै नरकम जैहीं (मत्ती २४-२५)।

विश्वास

सामान्य रुपम विश्वास कर्ना कलक केक्रोम भर पर्ना हो। बाइबलम विश्वास कर्ना कलक खास कैक परमेश्वरकम भर पर्ना हो। परमेश्वरकम भर पर्ना कलक द्याख नैसेकजैना बातम विश्वास कर्ना हो (हिब्रू ११:१)। हम्र परमेश्वरह ओ

हमार लाग करल परमेश्वरक प्रतिज्ञा भविष्यम कसिक पूरा हुई कना बात आँखिले द्याख नैसेकटी। तर हम्र बाइबलम परमेश्वरक कहल बात विश्वास कठी, जसिन कि, उहाँ मैया कर्नाहा बाट (१ यूहन्ना ४:८-१०), उहाँ हमार वास्ता कठ (१ पत्रुस ५:७) ओ आत्मिक जीवन जीएक लाग, आवश्यक पर्ना सब चिज उहाँ हमन देरखल (२ पत्रुस १:३-४)। हुइना त, रुख्वाबरेख्वा या चिरँचुरुङ्गन या हमार आसपासम रहल भौतिक वस्तु द्याखअस असिन बात हम्र आँखिले निदेख्ठी, तर फे हम्र असिन बात सत्य हो कैक विश्वास कठी ओ उह अनुसार जीठी।

उदाहरणक लाग, मानि ले डगरीम जैटी-जैटी, एकठो सङ्गवा रहल ठाउँम पुगठी। उ सङ्गवा बल्या बा कैक विचार कठी, तर उ सङ्गवमसे उपार निजैटी कलसे, उ सङ्गवा जाट्टीसे बल्या बा कैक हम्र विश्वास निकटी। तर, यदि उ सङ्गवमसे उपार जैटी कलसे, उ सङ्गवम भर पर्ली कना बात थाहाँ हुइठा। यी बात सङ्गवम विश्वास करल बात हो।

ओसहँक, परमेश्वर परम उपकारी बाट (भजनसंग्रह १४५:८-९; मर्कूस १०:१८), उहाँ हमन मुक्ति देठ (एफिसी २:८-९), ओ उहाँ हर समयम हमार भलो हुइना काम कठीबाट कना बात हम्र विश्वास करपर्ठा (रोमी ८:२८)।

व्यवस्था

साधारण हिसाबले थारु समाजम व्यवस्था कलक राजनैतिक व्यवस्था बुझैठा। तर पुरान नियमम, व्यवस्था कलक जीवनक सक्कु पक्षह समेट्ठा: मजा ओ नैमजा व्यवहार, धार्मिक क्रियाकलाप, ओ सामाजिक जीवन (राजनीति समेत)। इस्राएलीन्हक शासक परमेश्वर हुइलकओसे, व्यवस्था कलक परमेश्वरक इच्छा, आज्ञा, ओ नियम हो। व्यवस्था भङ्ग कर्ना कलक परमेश्वरक आज्ञा नैमन्ना हो, या नियम उल्लङ्घन कर्ना हो, या पाप कर्ना हो। उहओसे इस्राएलीहुँक सब काम व्यवस्था अनुसार करँट्। सब काम कलक पारिवारिक ओ सामाजिक क्रियाकलाप (जस्त: भ्वाजकाज, मर्नीकर्नी, स्वास्थ्य ओ सरसफाइ), धार्मिक क्रियाकलाप (जस्त: परमेश्वरक आराधना, ओ टैटिहार) आदि पर्ठा।

शुरुम, परमेश्वर मोशह दश मुख्य आज्ञा देलह (प्रस्थान २०:१-१७)। पाछ, यी आज्ञह मोशा बिस्तारित रुपम बाइबलक पैल्ह पाँचठो किताबम लिखल

(उत्पत्ती, प्रस्थान, लेवी, गन्ती, ओ व्यवस्था)। बाइबल पुरान नियम ओ लौव नियम कैक दुई भागम लिखल बा। पुरान नियमम, यी पाँचठो किताब समेत, जम्माजम्मी उनन्चालीसठो किताब बा। पुरान नियमक और किताब परमेश्वरक वचन बोनुइयन, राजाहुँक, ओ और मनै लिखलह। यी सक्कु मनै यहूदी रलह। कबुकाल पूरा पुरान नियमह व्यवस्था कैजिठा (यूहन्ना १०:३४; १२:३४; १५:२५)। कबुकाल जुन पुरान नियमक पैल्ह पाँचठो किताबह केल व्यवस्था कैजिठा (लूका २४:४४)।

परमेश्वर "इस्त्राएलीहुँकन दिहस्" कैक मोशह दश आज्ञा ओ बाइबलक पैल्ह पाँचठो किताबम रहल और व्यवस्था दिहलओसें, मोशक लिखल यी पाँचठो किताबह कबुकाल मोशक व्यवस्था फे कैजिठा (मलाकी ४:१; लूका २४:४४; यूहन्ना १:१७; प्रेरित ६:१३-१४; २८:२३)।

ख्रीष्टीयनहुँक बुझपर्ना महत्वपूर्ण बात का हो कलसे पुरान नियमक धेर जसिन व्यवस्था, जसिन खाना ओ स्वास्थ्यसे सम्बन्धित व्यवस्था ओ निश्चित धार्मिक व्यवस्था, हमार लाग येशूक आनल मुक्तिक कारणले प्रभावकारी निहो (गलाती ३:२३-२९; हिब्रू ९:१-१०:१८)। तर येशू व्यवस्था भङ्ग कर अइलक निहुइट, उहाँ त व्यवस्था पूरा कर अइलक हुइट (मत्ती ५:१७-२०)।

शैतान

शैतान भूतन्हक रज्वा हो (मर्कूस ३:१३) ओ परमेश्वरक मुख्य शत्रु हो। उ फे आत्मा रलकओसें, ओही द्याख नैसेकजाइट । वाकर मुख्य काम कलक परमेश्वरक विरोध कर्ना हुइस, तर शैतान मनपर्दी कुछु फे कर नैपाइट(अय्यूब १)। शैतान परमेश्वरक विरोध केल नैकरट, तर मनैन दुःख देना काम फे कर्ठा। उ मनैन्हक म पापी मन जगादेठा, उहओसें मनै औरजहन ठग्ना, ढँटना, लुटना, ओ मुवैना काम कर्ठा। असिक मनै पापम फँसठ (यूहन्ना ८:४४; १३:२; २ कोरिन्थी २:११; एफिसी ६:११; १ तिमोथी २:२४)। शैतान मनैन परमेश्वरकम विश्वास कर नैदिहट (२ कोरिन्थी ४:४)। उ परमेश्वरक करल सृष्टि ओ योजना भताभुङ्ग पर्ना काम कर्ठा, तर परमेश्वरसे अनुमति पाइलसम केल बिगार करसेकठा (अय्यूब १:१२; २:६)।

हम्र परमेश्वरक शक्तिले केल शैतानह हराइसेकठी। यदि हम्र शैतानक विरोध कर्बी कलसे, उ हमारटेसे भग्नेबा (याकूब ४:७)। क्रूसम टङ्गागिल येशू शैतानह हारारखल (हिब्रू २:१४-१५)। उह फे संसारम वाकर शक्ति आम्हीसम पलबाटसा। तर अन्तम, शैतानह सह अन्तम दुःख भ्वाग परहिस, काकरकि उ आगीक भट्टीम फाँकजैनेबा (प्रकाश २०:७-१०)।


स्वर्ग

स्वर्ग परमेश्वरक घर हो। स्वर्गक खबर पुगुइयन उहँ परमेश्वरक आराधना कर्तीरठा। येशूकम विश्वास करुइयन मुलसे, स्वर्गम सहुभर परमेश्वरकसँग रहइयाबाटा। मुक्ति पैना कलक स्वर्ग जैना हो (२ कोरिन्थी ४:१६-१८; १ पत्रुस १:४)। स्वर्ग कलक दुःखकष्ट, रोगबेराम, झगाझाँटी, या चिन्ताफिक्री नैहुइना ठाउँ हो, तर खुशी, आनन्द, सुखचैन, रमाहटम रहपैना ठाउँ हो (२ तिमोथी ४:१८; १ पत्रुस ५:१०; प्रकाश २१:१-४)।

स्वर्गदूत

स्वर्गदूत परमेश्वरक सेवा करुइयन हुइट (हिब्रू १:७)। हुँक मने नैहुइट, ओ हुँकन्हकम पाप नैरटिन। सामान्य रुपले हुँकन द्याख निसेकजाइट, तर जब परमेश्वर हुँकन मनैन्हकठे खबर पुगाइ पठैठन, तब हुँक मनेअस देखपठ। कबुकाल मनैन्हकठे देखपरबेर, हुँक चहकार उज्जर झुल्वा घाललअस देखपठ। हुँकन्हक मुह फे चहकार उज्जर देखपठिन, ओ हुँकन देखक मने डरैठ (मत्ती २८:२-३; मर्कूस १६:५-८; लूका १:११-१३; २:९)।

जे होस्, स्वर्गदूत मनैअस नैहुइट, काकरकि हुँक भ्वाजकाज नैकर्ट, ओ लर्कापर्का नैजर्मेट (मर्कूस १२:२५)। हुँक परमेश्वरक सेवा ओ उहाँक खबर मनैन्हकठे पुगादेना काम केल नैकर्ट, तर परमेश्वरक आराधना फे कठ (लूका २:१३-१४; हिब्रू १:६; प्रकाश ५:११-१२)।



रोम

इटालिया

फिलिप्पी

थ्रेसलोनिका

बेरिया

माकेडोनिया

कोरिन्थ

एथेन्स

भूमध्य सागर


साइप्रस

क्रेट

थ्रेसलोनिका ओ वाकर आसपासक क्षेत्र

यरूशलेम

मिश्रदेश यहूदिया



५०० कि. मि.